



Inatsisartuni ilaasortaq Ruth Heilmann, Siumut  
-/Maani

**§ 37 naapertorlugu apeqquteqaammut nr. 2011-147-imut akissuteqaat  
Mellembølgekkut nassitsissutit atorunnaarnerat**

09. august 2011  
Sagsnr. 2011-053528  
Dok. Nr. 700623

Asasara Ruth Heilmann

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: [iaan@nanoq.gl](mailto:iaan@nanoq.gl)  
[www.nanoq.gl](http://www.nanoq.gl)

Mellembølgekkut nassitsissutit atorunnaarnerat pillugu saaffiginnissutinnut qujanaq. Apeqqutitit tullerriaarneri malillugit matuma kinguliani akineqarput. Kisiannili aallarniutigalugu sooq Naalakkersuisut mellembølgekkut nassitsissutit matuneqarnissaat pillugu aalajangersimanersut naatsumik nassuiaateqarfigissavara.

Mellembølgekkut nassitsissutit, pisortatigoortumik februaarip ulluisa aqqarnanni atorunnaarsinneqartut – Simiutap qeqertaani nassitsissut, maajip ulluisa aqqarnat tikillugu nassitsisartussaq kisimi pinnani – KNR radiup aallakaatitaanik aallakaatitsinermit atorneqarsimapput.

Nassitsissutit KNR radiup nunaqarfinnut aallakaatinneqartarnissaa anguniarlugu sanaajupput; tamanna ullumikkut FM-ikkut nassitsissutit atorlugit ingerlanneqarpoq. Tassalu ukiut arlallit ingerlanerini KNR radio nassitsissutit marluk ataatsikkoortillugit aallakaatinneqartarsimavoq. Kisiannili mellembølgekkut nassitsissutit atorlugit inuit ikittunnguit, KNR radiop aallakaatitaanik tusarnaarsinnaangikkaluartut sullinniarlugit nassitsissutit marluusut ukioq manna tikillugu ingerlatiinneqarsimapput.

Kisiannili mellembølgekkut nassitsissutit 1980-imeersuupput – taamaattumillu ukiunik 30-erpianik pisoqaassuseqarlutik. Taamaattumik ukiuni tulliuuttuni aserfallatsaaliorneqarnissamik pisariaqartitsinerat annertusiartorsimavoq. Tamatuma saniatigut nassitsissutinut taamaattunut kingoraartissanik sanaartortoqarunnaarsimavoq. Tamatuma kingunerisaanik KNR radio mellembølgekkut nassitsissutit atorlugit aallakaatinneqartaannassappat nassitsissutinut nutaanut aningaasarpassuarnik aningaasaliisoqartariaqartussanngorpoq. Aningaasaliissutissat taakku inuiaqatigiit aningaasaqarnerat eqqarsaatigalugu illersorneqarsinnaangitsutut Naalakkersuisut naliliiffigaat, taamaattumillu nassitsissutit atorunnaarsinneqassasut Naalakkersuisut aalajangerput.

Nassitsissutit atorunnaarsinneqarnerisigut ingerlatsinermit sipaagassat nassitsissutit digitaliusut nutaat ingerlanneqarnerinut atorneqassapput.

Taamaattumik atorunnaarsitsineq illit allannittut sipaarutissanut pilersaarummut ilaangilaq, kisiannili nutarteriniarluni suliniutinut, nunap iluani nassitsissutinik

nutarterinissatsinnik, kiisalu nassitsissutit ataatsikkut aallakaatitsisarnerannik ingerlatsiinnarniarluta isumalluutunik atuingnissatsinnik qulakkeerisussanut ilaavoq.

Atorunnaarsitsinissarli sinerissami radioqarfiit mellembølgekkut sullissinerannut sunniuteqassanngilaq, tassani atortut assigiinngitsut marluk pineqarmata. Tassalu imaatigut ajunaalerneranut isumannaallisaanermullu sullissineq kalluarneqassanngilaq. Taamatutaaq sinerissami radioqarfik ilaqtannut il.il. attaveqartarnermi suli attaveqatigiinnermut atorneqarsinnaavoq.

Silassamut nalunaarummut, inuppassuit ileqquusut malillugit KNR radiokkut tusarnaartagaannut tunngatillugu, taakku 2010-mi juunip naanerata kingorna sinerissami radioqarfiup VHF-ikkut sullissineranut kanaliisigut nal. 08.05, 12.05, 18.05 kiisalu 22.05 aallakaatinneqartalerput. 12.05 aamma 22.05 aallakaatitseqqinnerupput. Tamatuma saniatigut Danmarks Meteorologiske Institut-imiit anorersuarnissaanut, anorsarinnissaanut sikoqarneranullu aarlerisaarutit sinerissami radioqarfiup VHF-ikkut sullissineranut kanaliisigut nal. 06.05, 11.05, 16.05 kiisalu 21.05 aallakaatinneqartarput. Aarlerisaarutit kalaallisut, danskisut tuluttullu aallakaatinneqartarput. Tassanngaannaq silarlulersimappat aarlerisaarutit erngerlutik aallakaatinneqartussaapput.

Ataatsimut isigalugu atorunnaarsitsinerup isumannaallisaanermut sunniuteqannginnissaa Naalakkersuisunit annertuumik pingaartinneqarpoq.

### **1. Mellembølgep atorunnaarneratigut attaveqarniarnikkut ajorseriaateqarnera Naalakkersuisut qaqugu aaqiiviginiarpaat?**

Matuma siuliani taaneqartutut atorunnaarsitsineq sinerissami radioqarfiup mellembølgekkut sullissineranut sunniuteqanngilaq, tassani atortut assigiinngitsut marluk pineqarmata. Tassalu imaatigut ajunaalerneranut isumannaallisaanermullu sullissineq kalluarneqanngilaq. Taamatutaaq sinerissami radioqarfik ilaqtannut il.il. attaveqartarnermi suli attaveqatigiinnermut atorneqarsinnaavoq..

Taamaattumik mellembølgekkut nassitsissutit atorunnaarsinneqarnerisa kingunerisaanik attaveqatigiinnermi ajornartorsiortoqalissanngitsoq Naalakkersuisut isumaqarput. Killormulli atorunnaarsitsinerup isumannaallisaanikkut sunniuteqannginnissaa Naalakkersuisut annertuumik pingaartippaat.

### **2. Angalasunut ungasissumittunut attaveqarniarnerup ajornarsinera pillugu ajutuulernermi kallerreeritaarsinnaanerup pisinnaannginnera assut aarleqqutigineqalersimavoq, tassuunakkut Naalakkersuisut attaveqaatit aaqiivigineqarnissaanik sukkasuumik suliniuteqarpat?**

Apeqquut 1-imut akissut innersuussutigerusuppara.

### **3. Maniitsumi avataasiortuni angalasut Tunumilu aalisartut oqaatigaat Islandimut Danmarkimullu attaveqarsinnaagaluarlutik nunatsinnut attaveqarsinnaannginnertik ajornartorsiutigigaat, taamaalillutik ilaqtannut sulisitsisuminnullu attaveqarsinnaanertik assut ajorseriaateqartumik ajornartorsiutilersimavaat, tamanna mellembølgep atorunnaarneranik peqquteqarsimappat taava Naalakkersuisut qanoq qaqugulu aaqiinalersaarpat?**

Matuma siuliani taaneqartut atorunnaarsitsineq sinerissami radioqarfiup mellembølgekkut sullissineranut sunniuteqanngilaq, tassani atortut assigiinngitsut marluk pineqarmata, taamaattumillu ilaqtutanut sulisitsisunulluunniit attaveqarniarnermi sinerissami radioqarfik suli attaveqaqatigiinnermut atorneqarsinnaavoq.

Kangerluit ilaat VHF-ikkut attaveqarfigineqarsinnaanngimmata Naalackersuisunit eqqumaffiqeqarpoq. Maannakkorpiarli VHF-ikkut aallakaatitsiviusartut annertusinissaanut pilersaaruteqartoqanngilaq.

Tamanna pissutigalugu Ineqarnermut, Attaveqarnermut Angallanermullu Naalackersuisoqarfiup TELE Greenland suleqatigalugu VHF-ikkut aallakaatitsiviusinnaasut ullumikkut sumerpiamiinnersut paasiniarpaa. VHF-ikkut nassitsissutit annertusineqassanersut pillugu oqallinnissamut tunngaviliinissaq siunertaralugu taamatut paasiniaasoqarpoq. Paasiniaanerup 2011-p ukiuata affaata aappaata ingerlanerani piareernissaa naatsorsuutigaara.

Sinerissami radioqarfiit ajunaalernermut isumannaallisaanermullu sullissinerit, taakkununga VHF-ikkut aallakaatitsiviusartut danskit naalagaaffiannit akisussaaffiqeqarput aningaasalersorneqarlutillu. Taamaattumik alliliinissamut ingerlatsinermullu aningaasartuutissat danskit naalagaaffiata isumagisassarai. Matumani aamma nunat tamat akornanni pisussaaffiit aalajangersakkallu, Danmarkip akuerisimasai siunissamilu suliassaqarfiup iluani atuuttussatut akuerisassai naammassiniarlugit pisariaqartinneqartumik atortut piorsarnissaannut aningaasalersuinissaq naalagaaffiup pisussaaffigaa. Sullissinerit neqeroorutigineqartussat annertussusissaat pilersuisussaataitanermi nassuiarneqarput. Nunat tamalaat akornanni isumaqatigiissutigineqartut saniatigut neqerooruteqartoqarnissaanik Naalackersuisut tungaanniit aalajangertoqassappat, aningaasalersuinissaq Namminersorlutik Oqartussat kisimik pisussaaffigilissavaat.

**4. Aammalu piniarnermut nakkutilliisuutitatta angalaarnerminni ajutoornermik naamattueriataarnissamut attaveqaatit ajornerat pillugu iliuseqariataarnissap pisinnaannginnera assut aarleqqutaanut ilaammat piarnerpaamik aaqqiisoqarnissaa ujarorneqarpoq tassuunakkut Naalackersuisut qanoq pilersaaruteqarnersut innuttaasunit paasisaqarfigitissallugu pingaaruteqarpoq, taamaattumik paasissutissiinissaq innuttaasut amigaatigisaat pillugu Naalackersuisut qanoq iliulersaarpat?**

Siusinnerusukkut oqaatigineqareersutut atorunnaarsitsinerneq imaatigut ajunaalernermut isumannaallisaanermullu sullissineq eqqorneqartussaannngilaq. Taamaattumik piniarnermik nakkutilliisut ernumassuteqarnerat tunngavissaqanngilaq, paatsoornermillu tunngaveqarsimassalluni. Taamaattumik Ineqarnermut, Attaveqarnermut Angallanermullu Naalackersuisoqarfiup naalackersuinerneq oqartussaasut, tassalu Piniarnermut, Aalisarnermut Nunalerinermullu Naalackersuisoqarfik qinnuiginiarpai, atorunnaarsitsinerup sunniutissai suunersut pillugit piniarnermik nakkutilliisut ilisimateqqullugit.

Takuneqarsinnaasutut mellembølgekkut nassitsissutit atorunnaarsinneqarnerisa isumannaallisaanermut sunniutissai pillugit eqqarsaatersuutigisatit qujanartumik tunngavissaqanngillat.

Ukiup aallartinnerani Ineqarnermut, Attaveqarnermut Angallannermullu Naalackersuisoqarfik tusagassiorfinnut nalunaarummik nassiuussivoq, taamatullu aamma atorunnaarsitsineq tusagassiuutitigut sammineqangaatsiarpoq. Taamaattumik isumaqarpunga atorunnaarsitsinermi sinerissami radioqarfiup eqqorneqannginnissaa pillugu innuttaasut naapertuuttumik ilisimatinneqarsimasut.

Neriuppunga matuma siuliani akissutigineqartut naammagissagitit, aammalu apeqquutitit pillugit qutsavigaakkit.

Inussiarnersumik inuulluaqqusillunga

Jens B. Frederiksen